

五代史第六十五

南漢世家第五

劉隱其祖安仁上蔡人也後徙閩中商賈南海因家焉父謙爲廣州牙將唐乾符五年黃巢攻破廣州去略湖湘聞廣州表謙封州刺史賀江鎮遏使以禦梧桂以西歲餘有兵萬人戰艦百餘艘謙三子曰隱台巖謙卒廣州表隱代謙封州刺史乾寧中節度使劉崇龜死嗣薛王知柔代爲帥行至湖南廣州將盧瑊玘作亂知柔不敢進隱以封州兵攻殺瑊玘迎知柔知柔辟隱行軍司馬其後徐彥若代知柔表隱節度副使委以軍政彥若卒軍中推隱爲畱後天祐二年拜隱節度使梁開平元年加檢校太尉兼侍中二年兼靜海軍節度安南都護三年加檢校太師兼中書令封南平王隱父子起封州遭世多故數有功於嶺南遂有南海隱復好賢

士是時天下已亂中朝人士以嶺外最遠可以辟地多游焉唐世名臣謫死南方者往往有子孫或當時仕宦遭亂不得還者皆客嶺表王定保倪曙劉濬李衡周傑楊洞潛趙光胤之徒隱皆招禮之定保客管巡官曙唐太學博士濬崇望之子以避亂往衡德裕之孫唐右補闕以奉使往皆辟置幕府待以賓客傑善星歷唐司農少卿因避亂往隱數問以災變傑恥以星術事人嘗稱疾不起隱亦容之洞潛初爲邕管巡官秩滿客南海隱嘗師事之後以爲節度副使及龔僭號爲陳吉凶禮法爲國制度略有次序皆用此數人焉乾化元年進封隱南海王是歲卒年三十八弟龔立龔初名巖謙庶子也其母段氏生龔於外舍謙妻韋氏素妬聞之怒拔劍而出命持龔至將殺之及見而悸劍輒墮地良久曰此非常兒也後三日卒殺段氏養龔爲己子及長善騎射身長七尺垂

手過膝隱爲行軍司馬龔亦辟薛王府諮議叅軍隱鎮南海龔爲副使隱卒龔代立乾化二年除清海軍節度使檢校太保同平章事三年加檢校太傅末帝卽位悉以隱官爵授龔龔封南海王唐末南海最後亂僖宗以後大臣出鎮者天下皆亂無所之惟除南海而已自隱始亦自立是時交州曲顥桂州劉士政邕州葉廣略容州龐巨昭分據諸管盧光稠據虔州以攻嶺上其弟光睦據潮州子延昌據韶州高州刺史劉昌魯新州刺史劉潛及江東七十餘寨皆不能制隱攻韶州龔曰韶州所賴者光稠擊之虔人必應應則首尾受敵此不宜直攻而可以計取隱不聽果敗而歸因盡以兵事付龔悉平諸寨遂殺昌魯等更制刺史卒出兵攻敗盧氏取潮韶又西與馬殷爭容桂殷取桂管虜士政龔取容管逐巨昭又取邕管隱龔自梁初受封爵稟正朔而已貞明三年龔卽皇帝

位國號大越改元曰乾亨追尊安仁文皇帝謙聖武皇帝隱襄皇
帝立三廟置百官以楊洞潛爲兵部侍郎李衡禮部侍郎倪曙工
部侍郎趙光胤兵部尙書皆平章事光胤自以唐甲族恥事僞國
常怏怏思歸龔乃習爲光胤手書遣使閒道至洛陽召其二子損
益并其家屬皆至光胤驚喜爲盡心焉龔性聰悟而苛酷爲刀鋸
支解剝剔之刑每視殺人則不勝其喜不覺朵頤垂涎呀呷人以
爲真蛟蜃也又好奢侈悉聚南海珍寶以爲玉堂珠殿二年祀天
南郊大赦境內改國號漢龔初欲僭號憚王定保不從遣定保使
荆南及還懼其非已使倪曙勞之告以建國定保曰建國當有制
度吾人南門清海軍額猶在四方其不取笑乎龔笑曰吾備定保
久矣而不思此宜其譏也三年間越國夫人馬氏爲皇后馬氏楚
王殷女也四年春置選部貢舉放進士明經十餘人如唐故事歲

以爲常七年唐莊宗入汴龔懼遣宮苑使何詞入詢中國虛實稱
大漢國主致書大唐皇帝詞還言唐必亂不足憂龔大喜又性好
夸大嶺北商賈至南海者多召之使升宮殿示以珠玉之富自言
家本咸秦恥王蠻夷呼唐天子爲洛州刺史是歲雲南驃信鄭旻
遣使致朱鬃白馬以求婚使者自稱皇親母弟清容布燮兼理賜
金錦袍虎綾紋攀金裝刀封歸仁慶侯食邑一千戶持節鄭昭滄
昭滄好學有文辭龔與游燕賦詩龔及羣臣皆不能逮遂以隱女
增城縣主妻旻八年作南宮王定保獻南宮七奇賦以美之龔初
名巖又更曰陟九年白龍見南宮三清殿改元白龍又更名龔以
應龍見之祥有胡僧言識書滅劉氏者龔也龔乃採周易飛龍在
天之義爲龔字音儼以名焉四年楚人以舟師攻封州封州兵敗
於賀江龔懼以周易筮之遇大有遂赦境內改元曰大有遣將蘇

章以神弩軍三千救封州章以兩鐵索沈賀江中爲巨輪於岸上築堤以隱之因輕舟迎戰陽敗而奔楚人逐之章舉巨輪挽索鎖楚舟以彊弩夾江射之盡殺楚人三年遣將李守鄺梁克貞攻交趾擒曲承美承美至南海龔登儀鳳樓受俘謂承美曰公常以我爲僞廷今反面縛何也承美頓首伏罪乃赦之承美顥子也克貞又攻占城掠其寶貨而歸四年愛州楊廷藝叛攻交州刺史李進逖歸龔遣承旨程寶攻廷藝寶戰死五年封子耀樞邕王龜圖康王洪度秦王洪熙晉王洪昌越王洪弼齊王洪雅韶王洪澤鎮王洪操萬王洪杲循王洪暉息王洪邈高王洪簡同王洪建益王洪濟辨王洪道貴王洪照宜王洪政通王洪益定王九年遣將軍孫德成攻蒙州不克十年交州牙將皎公羨殺楊廷藝自立廷藝故將吳權攻交州公羨來乞師龔封洪操交王出兵白藤以攻之龔

以兵駐海門權已殺公羨逆戰海口植鐵櫓海中權兵乘潮而進
洪操逐之潮退舟還櫓者皆覆洪操戰死龔收餘衆而還十五
年龔卒年五十四諡天皇帝廟號高祖陵曰康陵子玠立
玠初名洪度封秦王龔子耀樞龜圖皆早死玠次當立龔病臥寢
中召右僕射王翽與語呼洪度洪熙小字曰壽雋雖長然皆不足
任吾事惟洪昌類我吾欲立之奈何吾子孫不肖後世如鼠入牛
角勢當漸小爾因泣下歔翽爲龔謀出洪度以邕州洪熙容州
然後立洪昌爲太子議已定崇文使蕭益入問疾龔以告之益諫
曰少者得立長者爭之禍始此矣由是洪度卒得立更名玠改元
曰光天尊母趙昭儀爲皇太妃以晉王洪熙輔政玠立果不能任
事龔在殯召伶人作樂飲酒宮中裸男女以爲樂或衣墨縗與娼
女夜行出入民家由是山海間盜賊競起妖人張遇賢自稱中天

八國王攻陷循州玠遣越王洪昌循王洪杲攻之遇賢圍洪昌等
於錢帛館裨將萬景忻陳道庠力戰挾二王潰圍而走玠莫能省
嶺東皆亂洪熙日益進聲妓誘玠爲荒恣玠亦頗疑諸弟圖已敕
宦官守宮門入者皆露索洪熙洪杲洪昌陰遣陳道庠養勇士劉
思潮譚令禪林少彊少良何昌延等習爲角觝以獻玠玠宴長春
宮以閱之玠醉起道庠與思潮等隨至寢門拉殺之盡殺其左右
玠立二年年二十四諡曰殤弟晟立

晟初名洪熙封晉王旣弑玠遂自立改元曰應乾以洪昌爲兵馬
元帥知政事洪杲副元帥劉思潮等封功臣晟旣弑兄立不順懼
衆不服乃益峻刑法以威衆已而洪杲屢請討賊陰勸晟誅思潮
等以止外議晟大怒使使者夜召洪杲洪杲知不免乃畱使者入
具沐浴詣佛前祝曰洪杲誤念來生王宮今見殺矣後世當生民

家以免屠害因涕泣與家人訣別然後赴召至則殺之冬晟祀天
南郊改元曰乾和羣臣上尊號曰大聖文武大明至道大光孝皇
帝二年夏遣洪昌祠襄帝陵於海曲至昌華宮晟使盜刺殺之晟
自殺洪杲由是與諸弟有隙而洪昌最賢夔素所欲立者晟尤忌
之故先及害鎮王洪澤居邕州有善政是歲鳳凰見邕州晟怒使
人酖殺之而諸弟相次皆見殺三年殺其弟洪雅又殺劉思潮等
五人思潮等死陳道庠懼不自安其友鄧仲以荀悅漢紀遺之道
庠莫能曉仲罵曰憨獠韓信誅而彭越醢皆在此書矣道庠悟益
懼晟聞之大怒以道庠仲下獄皆斬於市夷其族以右僕射王翺
爲英州刺史使人殺之於路五年晟弟洪弼洪道洪益洪濟洪簡
洪建洪暉洪照同日皆見殺六年遣工部郎中知制誥鍾允章聘
楚以求婚楚不許允章還晟曰馬公復能經略南土乎是時馬希

廣新立希萼起兵武陵湖南大亂允章具言楚可攻之狀晟乃遣
巨象指揮使吳珣內侍吳懷恩攻賀州已克之楚人來救珣鑿大
阱於城下覆箔於上以土傅之楚兵逼城悉陷阱中死者數千楚
人皆走珣等攻桂州及連宜嚴梧蒙五州皆克之掠全州而還九
年冬又遣內侍潘崇徹攻郴州李景兵亦在與崇徹等遇戰大敗
景兵於宜章遂取郴州晟益得志遣巨艦指揮使暨彥贊以兵入
海掠商人金帛作離宮遊獵故時劉氏有南宮大明昌華甘泉玩
華秀華玉清太微諸宮凡數百不可悉紀宦者林延遇宮人盧瓊
仙內外專恣爲殺戮晟不復省嘗夜飲大醉以瓜置伶人尙玉樓
頂拔劍斬之以試劍因并斬其首明日酒醒復召玉樓侍飲左右
曰已殺之晟歎息而已十年湖南王進達以兵五萬率溪洞蠻攻
郴州潘崇徹敗達於蠓石斬首萬餘級十一年晟病甚封其子繼

興衛王璇興桂王慶興荆王保興祥王崇興梅王十二年晟親耕
藉田交州吳昌濬遣使稱臣求節鉞昌濬者權子也權自襲時據
交州襲遣洪操攻之洪操戰死遂棄不復攻權死子昌岌立昌岌
卒弟昌濬立始稱臣於晟晟遣給事中李璵以旌節招之璵至白
州昌濬使人止璵曰海賊爲亂道路不通璵不果行晟殺其弟洪
邈十三年又殺其弟洪政於是襲之諸子盡矣顯德三年世宗平
江北晟始惶恐遣使脩貢於京師爲楚人所隔使者不得行晟憂
形於色又嘗自言知星末年月食牛女閒出書占之歎曰吾當之
矣因爲長夜之飲十六年卜葬域於城北運甓爲塋晟親臨視之
是秋卒年三十九諡曰文武光聖明孝皇帝廟號中宗陵曰昭陵
子鋹立

鋹初名繼興封衛王晟卒以長子立改元曰大寶晟性剛忌不能

任臣下而獨任其嬖倖宦官宮婢延遇瓊仙等至鋹尤愚以謂羣臣皆自有家室顧子孫不能盡忠惟宦者親近可任遂委其政於宦者龔澄樞陳延壽等至其羣臣有欲用者皆闔然後用澄樞等既專政鋹乃與宮婢波斯女等淫戲後宮不復出省事延壽又引女巫樊胡子自言玉皇降胡子身鋹於內殿設帳幄陳寶貝胡子冠遠遊冠衣紫霞裾坐帳中宣禍福呼鋹爲太子皇帝國事皆決於胡子盧瓊仙龔澄樞等爭附之胡子乃爲鋹言澄樞等皆上天使來輔太子有罪不可問尙書左丞鍾允章叅政事深嫉之數請誅宦官宦官皆仄目二年鋹祀天南郊前三日允章與禮官登壇四顧指麾宦者許彥真望見之曰此謀反耳乃拔劍升壇允章迎叱之彥真馳走告允章反鋹下允章獄遣禮部尙書薛用丕治之允章與用丕有舊因泣下曰吾今無罪自誣以死固無恨然吾二

子皆幼不知父冤俟其長公可告之彥真聞之罵曰反賊欲使而子報讎耶復入白銀并捕二子繫獄遂族誅之陳延壽謂銀曰先帝所以得傳陛下者由盡殺羣弟也勸銀稍誅諸王銀以爲然殺其弟桂王璇興是歲建隆元年也銀將邵廷琄言於銀曰漢乘唐亂居此五十年幸中國有故干戈不及而漢益驕於無事今兵不識旗鼓而人主不知存亡天下亂久矣亂久而治自然之勢也今聞真主已出必將盡有海內其勢非一天下不能已勸銀修兵爲備不然悉珍寶奉中國遣使以通好銀懵然莫以爲慮惡廷琄言直深恨之四年芝茵生宮中野獸觸寢門苑中羊吐珠并旁石自立行百餘步而仆樊胡子皆以爲符瑞諷羣臣入賀五年銀以宦者李托養女爲貴妃專寵托爲內太師居中專政許彥真旣殺鍾允章惡龔澄樞等居已上謀殺之澄樞使人告彥真反族誅之

七年王師南伐克郴州晟所遣將暨彥贊與其刺史陸光圖皆戰死餘眾退保韶州銀始思廷珣言遣廷珣以舟兵出洗口抗王師會王師退舍廷珣訓士卒修戰備嶺人倚以爲良將有譖者投無名書言廷珣反銀遣使者賜死士卒排軍門見使者訴廷珣無反狀不能救爲立祠於洗口八年交州吳昌文卒其佐呂處珩與峯州刺史喬知祐爭立交趾大亂驩州丁璉舉兵擊破之銀授璉交州節度九年南海民妻生子兩首四臂是時太祖皇帝詔李煜諭銀使稱臣銀怒囚煜使者龔慎儀十三年韶潭州防禦使潘美出師師次白霞銀遣龔澄樞守賀州郭崇岳守桂州李托守韶州以備是歲秋潘美平賀州十月平韶州又平桂州十一月平連州銀喜曰昭桂連賀本屬湖南今北師取之足矣其不復南也其愚如此十二月平韶州開寶四年正月平英雄二州銀將潘崇徹先降

師次瀧頭銀遣使請和求緩師二月師度馬逕銀遣其右僕射蕭
灌奉表降灌行銀遑迫復令整兵拒命美等進師銀遣其弟祥王
保興率文武詣美軍降不納龔澄樞李托等謀曰北師之來利吾
國寶貨爾焚爲空城師不能駐當自還也乃盡焚其府庫宮殿銀
以海舶十餘悉載珍寶嬪御將入海宦官樂範竊其舟以逃歸師
次白田銀素衣白馬以降獻俘京師赦銀爲左千牛衛大將軍封
恩赦侯其後事具國史

隱興滅年世諸書皆同蓋自唐天祐二年隱爲廣州節度使至
宋開寶四年國滅凡六十七年舊五代史以梁貞明三年龔僭

號爲始故曰
五十五年爾

五代史第六十五終